

Segun Emerencia:

“No tin cuestion di curashi, mi a djis haci mi trabou”

KRALENDIJK – Casi e no por imagina cu e por a actua otro for di e manera cu el a actua durante su funcion di gezaghebber di Boneiro. Pa Lydia Emerencia e funcion di gezaghebber a caba, maske con cortico el a traha como tal. “Den dos aña e confiansa a kibra, mientras cu ta djis mi trabou mi tabata haci. Lo mi no kier a ni yam’e curashi.

Destino a dicidi cu ta dos aña so el a keda gezaghebber, asina e mes ta bisa. Desde 1 di maart 2014, Emerencia no ta gezaghebber mas. Lo e keda biba na Boneiro por lo menos seis luna mas y lo haci trabou di boluntario wardando un trabou nobo. No ta sigur ainda cu despues e lo keda biba na Boneiro of si e ta bay Aruba bek of Hulanda.

Curashi

Lydia Emerencia ta papia di hopi momento dificil den e ultimo dos añanan. El a cuestiona si tabatin bon gobernacion y integridad na Boneiro, dicta un ordo di emergencia contra WEB y a haci denuncia den caso di un permit di taxi iregular cu a duna, caminda un diputado tabata involucra estrechamente. “Lo mi no a yam’e curashi. Ta djis mi trabou mi a haci. E decisionnan no ta duel mi, pasobra a tuma nan a base di e informacion cu mi tabatin y a base di e manera cu mi a calcula, analisa y evalua.

Emerencia ta claro tocante su retiro. “Un gezaghebber no por funciona si tin un mision di desconfiansa. Tabata un expresion cu no tin boluntad pa traha cu mi. E ora ey a caba. Tin principio manera husticia y sinceridad cu nunca mi no lo nenga. No tabata trata di diferencia di opinion, maske con duro nos tabata grita. Mi por wanta un tormenta y semper mi a traha den procesonan di cambio. Pero na un dado momento e honestidad a bira hopi fragil.

Obstruccion

Emerencia ta bisa cu el a haya hopi obstruccion durante di e tempo cu e tabata gezaghebber. Su coleganan den bestuurscollege y specialmente den e coalicion di gobierno tabata yam’e no colegial. Y mucho critico. El a pasa den momentonan dificil. “E ora ey mi tabata sinti e presion di mi coleganan den gobierno, cu no tabata ke pa mi tuma cierto decision. Di otro banda mi tabata sa cu conforme ley, mi consenshi y reglanan di bon gobernacion, mi mester a tuma e decision ey.”

Emerencia a duna e idea di integridad forma na Boneiro y a trata di pas’e den su trabou tambe y den relacion cu su coleganan. Integridad ta su aspiracion. “Bo mester bay pa interes general. Excepcion mester confirma



regla; excepcion no mester bira regla. Mi ta hopi critico den asuntonan asina. Kisas mi ta mucho critico den termino manera nan a custuma aki, pero no den relacion cu responsabilidad di gobierno di Boneiro.”

Corta sinta

Mal comprendemento y ignorancia di e funcion di gezaghebber a hunga un rol grandi. “Un hende a yega di bisa mi: gezaghebber ta sinta so e tin di corta. Mayoria di mandatario parce

ta kere cu ta presidencia di bestuurscollege y conseho insular ta e tarea principal di un gezaghebber. No ta realisa cu ademas di ta funcionario, gezaghebber ta un organo di gobierno di un persona cu tarea independiente. Esaki a causa hopi situacion di bruhamiento y friccion. Si no bini e realisacion kico e funcion di gezaghebber ta encera, tur gezaghebber lo haya nan cu problema.” E articulo aki ta danki na retkaribe.nl. □